

ماہنامہ

# بزم گوجری

جولائی 2023



گوجری زبان کارکھوالا  
ڈاکٹر جاوید راہی

# ماہنامہ بزم گوجری

جولائی ۲۰۲۳



مدیر اعلیٰ: عطاء الرحمن چوہان    مدیر: عبدالرشید چوہدری  
مدیر معاون: زاہدہ خانم چوہدری، وقار احمد صدیقی



## فہرست مضامین

- ۱۔ فرمان الہی [ترجمہ قرآن]
- ۲۔ حمد باری تعالیٰ۔۔ شیر احمد کھٹانہ
- ۳۔ گوجری زبان کورا کھو، ڈاکٹر جاوید راہی
- ۴۔ افسانہ۔۔ بے آسرا، فرید راز
- ۵۔ افسانہ۔۔ بابو سائیں۔۔ وقار احمد صدیقی
- ۶۔ حرمت قرآن۔۔ شاہدہ چوہدری
- ۷۔ غزلیات: مخلص وجدانی، حنیف محمد چوہدری، حق نواز احمد، خلیل انجم، محمد فرید رازو دیگر

## مجلس مشاورت

مخلص وجدانی  
رفیق شاہد  
مفتی ادریس ولی  
غلام سرور رانا، شعیب شاہد رویش

## مجلس ادارت

جاوید سحر  
پروفیسر سجاد قمر  
شازیہ چودھری (راجوری)  
محمد فرید راز، (جموں کشمیر)  
حنیف محمد چوہدری، حق نواز احمد  
محمد خلیل انجم، عبدالروف کالوخیل  
شاہدہ چوہدری بنت قاضی محمد بشیر

بزم گوجری پاکستان [رجسٹرڈ]

✓ S-199, Malikabad shopping Mall, Satellite Town, Rawalpindi, Pakistan

✓ bazmegojri@gmail.com    Whats app +923005515140



عہدیداران بزم گوجری پاکستان



عبدالرشید چوہدری، صدر



عطاء الرحمن چوہان، سرپرست اعلیٰ



مولانا محمد فرید جلالی، سیکرٹری جنرل



مولانا محمد منظور، سنیئر نائب صدر

ماہنامہ "بزم گوجری" حسب روایت جولائی 2023 تھارہتھ ماہ ہے۔ گوجری زبان کی لکھت ماہ بادلے واسطے ہم مدت توں کوشش کر رہیاں۔ انفارمیشن ٹیکنالوجی تے سوشل میڈیا نے رابطہ بہتر تے ابلاغ سکھلو کر چھوڑیو ہے۔ دنیا کا کونا کونا ماہ گوجری بولن آلاں کے درمیان موثر رابطہ کی وجہ ناں گوجری لکھن، پڑھن تے فروغ غی کوشش رنگ لیا رہی ایں۔ دن بدن گوجری لکھ، آڈیو تے ویڈیو مواد ماہ بادلے ہو رہیو ہے۔ ہن اصل چیلنج معیاری گوجری ادب غی تخلیق، تدوین تے اشاعت کو ہے۔

"بزم گوجری" اس چیلنج غو مقابلو کرن واسطے شعراء تے ادیبوں کے تعاون نال معیاری ادب پیش کرن کی ایک حقیر کوشش ہے۔ شعری ادب ورتے پچھلے کج سالوں تیں بہت محنت ہوئی ہے، پرنٹری ادب ناں خاصی توجہ کی لوڑ ہے۔ اس غو ایک طریقہ واردو، انگریزی تے دوجیاں زبان غا معیاری ادب پاراں کو گوجری ترجمو کرن غی ضرورت ہے۔ گوجری شناس اہل علم کو فرض ہے کہ وے گوجری ادب ماہ بادلے واسطے گوجری ترجمہ کرن ور توجہ دیں۔ "بزم گوجری" کی ادارتی ٹیم اس ور کم کر رہی ہے۔ کالجاں تے یونیورسٹیاں کا طالب علموں کی ذمہ داری ہے کہ وے، گوجری ترجمہ پر خصوصی توجہ دیں۔

چیف ایڈیٹر

جولائی 2023

عطاء الرحمن چوہان

## حمد باری تعالیٰ

شیر عالم کھٹانہ (اوگی)



اے خدا تو رحمت والو

تیروناں اے برکت والو

کل جہاں ناروزی دے

تو بڑی سخاوت والو

کُل کاٹی نات تیندہ محتاج اے

تو اے سب پو قدرت والو

عزت ذلت تیرا ہاتھ ما

تو اے بڑی عزت والو

دنیا تو اے تیرا منہ تے

تو اے کتنی طاقت والو

ہر شے تیرا خواں اے تیری

تو اے کامل عفت والو

دیں نالو دنیا نالونی دے سکتو نادہ

نوڈیو و خو جوڑا کِ گھ ناخو لو چادی

ساری دنیا اپ ہی فتح کرن لازم نی

رہبر مجڑ مخلوق نامنزل کو پتو چادی

## گو جری زبان، ادب تے ثقافت کو را کھو ڈاکٹر جاوید راہی

شاز بہ چودھری راجوروی



ان گجر لوکاں کی طرز زندگی کو مطالعو کراں تے ہم نا پتو چلے جے ان لوکاں کی ثقافت کے ہے۔

اس قوم کا رسم تے رواج، خوشی منان کو انداز، غم گزاری کا لمحات یا ایک دو جاناں ہمدردی ظاہر کرن کا طور طریقاں کو اس قوم یا ثقافت نال تعلق نہ رکھن آلا اگر مشاہدو کریں تے ان نا عجیب لگے گو لیکن اس قوم آلا اپنی اس ثقافت ورفخر نال عمل کریں یاہ ہی ان کی ثقافت ہے اور یاہ ہی ان کی پہچان۔ ہو ر اس پہچان نابر قرار رکھن ما گجر قوم کا کنیں مرد مجاہداں کو تھتہ ہے جن کو اگر ہوں ناں گننو شروع کروں گی تے گل وچوں گل نکلتی جے گی ہو ر مضمون اپنا اصلی عنوان تیں ہٹ

زبان تے ثقافت کسے وی قوم کی مشترکہ پہچان و ہے۔ ایک قوم اس ویلا توڑی قوم نہیں کہو اتی جد تک اس کی زبان ہو ر ثقافت دوجی قوماں تیں بکھ نہ ہوے۔ اک قوم مخصوص جغرافیہ کے اندر رہ کے، مخصوص طور طریقو، اٹھن بیسن، رہن سہن، کھان پین ہو ر اپنی بکھ سوچ کی وجہ تیں دوجی قوماں تیں بکھ ہوے اس واسطے یہ بکھ بکھ انداز ہو ر طرز تے فکر اس قوم کی ثقافت کہو اوے۔ اک قوم نا ان کی زبان ہو ر ثقافت وراثت مالبہ ہو ر اس قوم واسطے قومی ورثہ کی اہمیت رکھیں۔

یاہ ہی وجہ ہے جہ زبان تے ثقافت کسے وی قوم کو اک حساس معاملو ہوے۔ دنیا کی تاریخ ما کنیں دفعہ قوماں کے بہتہار لڑائی صرف اپنی قومی شناخت نابر قرار رکھن کے واسطے ہوئی ہے۔ اس کی ایک بڑی مثال دوجی جنگ عظیم ہے اس جنگ کی وجوہات ما اک وجہ بکھ بکھ قومی شناختاں کو اک دو جاناںہ منو وی تھو۔ اسے راہ زبان تے ثقافت گجر قوم کی مشترکہ میراث ہے ان کارہن سہن تیں لے کے کھان پین، اٹھن بیسن، سوچن، منصوبہ بندی کرن، کسے وی کم کو کرن ہو ر نہ کرن کی منطقی دلیل ہو ر معاشرہ مازندگی گزارن تے تربیت کا اصولاں تے ضابطاں تک، جیہڑو اک مخصوص گجر قوم ما کنیں صدیاں توں چلتو آوے ہے وہ قوم کی مشترکہ میراث (ثقافت) ہے۔ جد ہم معاشرہ ما بسن آلا



جئے گو۔ ان وچوں ہوں صرف اک مرد کوناں لینو چاہوں گی ویسے  
تے وہ کسے تعارف کو محتاج نہیں تم اگر گوگل وں سرچ ماصرف گجریا  
گو جری لکھیں گاتے سب تیں پہلاں اسے مرد کوناں باندے آوے  
گو، آہاں مناں لگے قارئین وچوں کنیں سمجھ گیا وہیں گاجے ہوں کس  
کو ذکر کرن جارہی ہاں!

ڈاکٹر جاوید راہی! اک اسوناں جیہڑو اپنا آپ ماکی اداراں کی خصوصیت  
رکھے جس ناگجرا اسکالر، محقق، مؤرخ، ادیب، شاعر، مصنف، صحافی،  
ماہر لسانیات، دانشور، ترجمہ نگار، ڈراما نگار، کالم نویس، سماجی صلاح کار،  
لغت ساز، مقرر، یوٹیوبر، بلاگر، وی لاگر، براڈکاسٹر تے کنیں ہور  
شناختاں نال پچھانیو جئے

جموں و کشمیر کا ضلع پونچھ کا ایکن دور دراہڈا گراں چنڈک ماپہلی  
ستمبر 1970 ما معروف مزاحیہ شاعر تے ادیب بابونور محمد نور ہور  
راشدہ بیگم کے گھر جمیا ڈاکٹر راہی گجراں کی کھٹانہ گوت نال تعلق  
رکھیں۔ اپنی منڈھلی تعلیم اپنا ہی گراں چنڈک تیں مدرسہ اشاعت  
العلوم تیں حاصل کی، پنجمیں پاس کرن تیں بعد گورنمنٹ ہائر  
اسکندری اسکول چنڈک پونچھ ما داخلو لیو ہور بارہویں تک کی تعلیم  
اسے اسکول تیں پوری کی۔ فر 1993 ما گورنمنٹ ڈگری کالج پونچھ  
تیں گریجویشن مکمل کرن تیں بعد اعلیٰ تعلیم واسطے جموں یونیورسٹی ما  
داخلو لے لیو ہور 1995 ما اردو ایم اے کی ڈگری مکمل کی 2004 ما پی  
ایچ ڈی (ڈاکٹریٹ) کی ڈگری حاصل کرن تیں بعد۔ جموں و کشمیر  
اکادمی برائے فن، ثقافت تے لسانیات ملازمت لہجہ گئی اناکادمی کا  
گو جری شعبہ مابطور چیف ایڈیٹر کا فرائض انجام دے رہیا ہیں۔ ڈاکٹر  
جاوید راہی نے کنیں کتاب تصنیف کی ہیں۔ ہوران کی ادارت ماسو تیں

زیادہ کتاب تالیف ہوئی ہیں۔ انہاں نے گو جری زبان تے ادب ہور  
گجری قوم واسطے مچ کم کیا ہیں تے بدستور کر رہیا

گو جری زبان نا تعلیمی نصاب ماشاں کران کی جہدیاں ماوے پیش پیش  
رہیا ہیں ان کے مطابق گو جری زبان بنیادی basic تے ایلیمنٹری  
لیول elementary level تیں ہی نصاب ماشاں ہونی چاہیے۔



جموں و کشمیر بورڈ آف اسکول ایجوکیشن نے راہی نابطور گو جری زبان  
کانوینر تعینات کیوہے ہور گو جری نصاب تیار کروان مان کی خدمات  
لی ہیں۔ ڈاکٹر راہی گو جری زبان ناسکینڈری، ہائر سکینڈری تے کالج ہور  
یونیورسٹی تک کا تعلیمی نصاب ماشاں کرن کی جہدیں اجوی کر رہیا ہیں  
۔ ہور گو جری زبان ناہندوستانی آئین کا اٹھواں شیڈول ماشاں کروان  
واسطے وی حکومت ہند کے نال گجری قوم کی نمائندگی کر رہیا ہیں۔ راہی  
خانہ بدوش گجری قوم ما بکروال، ہور دودھی گجراں کا حق واسطے ہمیشہ  
اواز چاویں۔ جموں کشمیر مافاریسٹ رائیٹ ایکٹ (Forest right  
act) نالا گو کران ماوی راہی کو ہتھ ہے ہور فر گھر گھر، بستی بستی تے  
محلے محلے جا کے لوکاں ناس ایکٹ بارے رہنمائی تے جانکاری دین کو

کم وی کیو جموں کشمیر کو کوئی اسو ضلعو نہیں ہو سے جت ڈاکٹر راہی نے فارسیٹ رائیٹ ایکٹ جانکاری مہیم forest right act awareness program نہ چلا یو ہے ہو راجاں وی لوکاں ناس بارے جانکاری دے رہیا ہیں اس تیں علاوہ راہی نے شیڈول ٹرائیپ بچاؤ مہیم ماوی اہم کردار ادا کیو ہے اس مہیم ما انھاں ناچ ساری تنقید تے حراس کو سامنو وی کر نو پو لیکن انھاں نے اپنا قدم بچھاں کرن کے بجائے بکا کے رکھیا ہو راک مظبوط تھم کی حیثیت نال قوم نال کھلا رہیا

ڈاکٹر راہی نے جدید ٹیکنالوجی کی اہمیت نا سمجھتاں ما انٹرنیٹ ہو ر سوشل میڈیا سائنس پر گو جری زبان تے ثقافت نا خوب متعارف کرا یو ہے۔ گجر قوم کاوے پہلا شخص ہیں جنہاں نے سب تیں پہلاں ٹیکنالوجی تے میڈیا خاصکر سوشل میڈیا ہو ر گجرتے گو جری نا مشہور کیو ہو ر باقی نوجواناں کی وی اس پاسے رہنمائی کی اس تیں علاوہ الیکٹرانک میڈیا ماوی انھاں نے گو جری زبان تے ثقافت نا خوب اجاگر کیو ٹیک ون ایک نئی ٹی وی چینل پر مارچ 2006 ما گو جری زبان ما "گجر گونج" کانان نال ہفتہ وار پروگرام شروع کیو جس ما 150 قسطاں ور مشتمل پروگرام کیا۔ اسے چینل ور گو جری خبراں کو سلسلہ وی شروع کیو جیہڑو اجاں وی جاری ہے۔ 26 جنوری 2017 ما لیکن ہو ر نئی ٹی وی چینل گلستان نیوز ور ہفتہ وار گو جری پروگرام "مھاری واز" کانان نال شروع کیو جیہڑو مچ مقبول ہے اور اس کو سلسلو وی اجاں تک جاری ہے۔ اس کے نال ہی اسے چینل پر روزانہ گو جری خبراں کو سلسلو وی شروع کیو ہے جیہڑو عوام مچ مقبول ہے۔ سوشل میڈیا ہو ر ڈاکٹر جاوید راہی نے "جاوید راہی کانان نال اینواک یوٹیوب چینل لانچ کیو

جیہڑو گو جری زبان ہو ر ثقافت کی ترجمانی کرے ہو ر اس "جاوید راہی" یوٹیوب چینل نا "سلور کمرینٹر" ایوارڈ وی لبھو ہے جیہڑو یوٹیوب اسا چینلاں نادے جن کا ایک لکھ سبکسرانیہر ہو یں اسے یوٹیوب چینل

کے ذریعے راہی گو جری زبان تے ثقافت نا محفوظ کرن تے رہتی دنیا تک پہنچان ہو ر بین الاقوامی سطح ور متعارف کران کو کم کر رہیا ہیں۔ انٹرنیٹ کی مقبولیت ہو ر بدھتار حجان نا نظراں مارکھتاں ڈاکٹر راہی نے اپنی تصنیف ہو ر تالیف تے ادارت ماشائع تمام کتاباں کی پی ڈی ایف انٹرنیٹ پر اپلوڈ کی وی ہیں۔ ان کتاباں مادر جن تیں زیادہ تصنیفاں تیں علاوہ ان کی ادارت ماشائع لگ بھگ 300 کتاب گو جری زبان وادب ہو ر گجر قوم کی ترجمانی کر رہی ہیں گو جری مونو لینگول ڈکشنری، گو جری ہندی ڈکشنری کے علاوہ انسائیکلو پیڈیا آف ہمالین گجرس encyclopedia of Himalayan gujjars ان کی شہرا آفاق تصنیف ہیں۔

ڈاکٹر جاوید راہی ٹرائیبل ریسرچ اینڈ کلچرل فاؤنڈیشن Tribal research and cultural foundation نامی انجمن کا بانی سیکریٹری وی ہیں ہو ر اس انجمن کا بنر بھٹ وی انھاں نے گو جری زبان ،ادب تے ثقافت ہو ر گجر قوم کی خاطر کئی نمایاں کم کیا ہیں۔ سال 2002 ما انھاں نا وزارت ثقافت حکومت ہند ministry of culture new delhi کی طرفوں فیلوشپ نال نوازیو گیو جس کے تحت راہی نے قبائلی ہو ر خانہ بدوش قبیلاں ور تحقیق کو کم کیو ہو ر اس تحقیق ما خصوصی توجہ جموں کشمیر کا گجر بکروال قبیلہ ور دتی گئی وزارت ثقافت کی طرفوں دتا گیا اس فیلوشپ کے تحت انھاں نے گو جری زبان تے ثقافت ہو ر گجر قوم واسطے کئی اہم منصوباں ور کم کیو ہے جن ما انسائیکلو پیڈیا آف ہمالین گجرس (Himalayai gujjar enclopedeo-gojri) تے گو جری لوک ور اشتی ڈکشنری شامل ہیں



ڈاکٹر راہی نے قبائلی ہور خانہ بدوش وراثت، سماجیات تے معاشیات کا مدان ماقابل دید کم کیوہے۔ وہے گجر دلش چیریل ٹرسٹ جموں سمیت کجھ بکھ تنظیمماں کے زیر اہتمام مطالعات، سروے، سیمینار ہور کانفرنساں کاکجھ بکھ منصوباں نال وابستہ رہیاہیں۔ جموں کشمیر کاقبائلی تے دیہی علاقماں ماسینکڑاں پروگرام منعقد کرن کے علاوہ گوجری ہور اردو مادرجناں کتاب منظر عام وریان ماکامیاب رہیاہیں

ڈاکٹر راہی نے ترجمہ کاکائین پروجیکٹ کی سربراہی وی کی ہے جس کے تحت مچساری کتاباں کوانگلش، فارسی اردو ہور کشمیری تیں گوجری مازجمو کیوگیو ان کتاباں مامولانا جلال الدین رومی کی کتاب "مثنوی مولانا روم" گاندھی جی کی "my experience with truth" سعدی شیرازی کی "گلستان سعدی" میرامن کی "قصہ چہار درویش" ولی الدین عبدالرحمن ابن خلدون کی "تاریخ ابن خلدون" شیکسپیر کوڈرامو King - lier شامل ہیں ڈاکٹر راہی نے دور درشن، آل انڈیا ریڈیو تے مچسارانجی ٹی وی چینلاں نال منسلک رہتاں مابچ گوجری ڈراما لکھیا جیہڑا بے گجر ثقافت تے رسم ورواج ورمبئی ہیں اس تیں علاوہ انہماں نے سوتیں زیادہ گجر شخصیتاں کانرویو کیا، قومی تے بین الاقوامی سطح ورسیمیناراں تے کانفرنساں ماحصولیو

وے 2002 مائیشنل اکیڈمی آف لیٹرز سہایتیہ اکادمی کی وزارت ثقافت حکومت ہند نوں دلی مابھاشا سمان کی جیوری کارکن وی رہیاہیں۔ اس تیں علاوہ انہماں نے

اک مقبول کالم نگار کی حیثیت نال ملک کاکجھ بکھ اخباراں مانگراں کا ثقافتی ورثہ کاکجھ بکھ پہلواں پرائنگریزی، اردو ہور گوجری 300 تیں زیادہ مضمون لکھیاہیں۔

سال 1999 مانگوجری ادب کی خدمات کاعتراف ماہوران کی گوجری تحقیقی کتاب "لوک ورثو" واسطے اکادمی برائے فن ثقافت تے لسانیات نے ڈاکٹر راہی ناریاست کاسب تیں بڑا ادبی اعزاز نال نوازیو اکادمی کی ہی طرفوں ان ناBest play writer کا اعزاز نال وی نوازیو گیواس تیں علاوہ مچساری NGOS کی طرفوں وی ان نااہم اعزازات دتا گیا جن م(Haryana gujar samaj) ہریانہ گجر سماج تنظیم کی طرفوں rob of honour وی شامل ہے۔ ڈاکٹر جاوید راہی بین الاقوامی سطح ورجوجری زبان تے ادب ہور گجر ثقافت ناچان تے اس نا اجاگر کرن واسطے مچجدوجہد کر رہیاہیں۔ ان کی ان کاوشاں نادیکھتاں ماسال 2022 مامحکمہ قبائلی امور جموں و کشمیر Tribal affairs department of jammu and kashmir کی طرفوں وی انہماں Tribal award نال نوازیو گیوہے

## گوجری ترجمہ کار

اردو، انگریزی تے دو جیاں زباں کامعیاری ادبی مواد ناں گوجری ماں ترجمہ کرن آلاء نوجواناں کی لوڑ ہے۔ جیہڑا ہر مہینہ ماں کم از کم پنج ورقہ ترجمو کر سکیں

بزم گوجری پاکستان، واٹس ایپ +923495059760



## انسانو بے آسرا محمد فرید راز، بابا غلام شاہ بادشاہ یونیورسٹی راجوری

بہن ریشم بی تھوڑا دھیاڑا آگے کچھے کر کے اس دنیا پروں ٹر گیا۔ تے اپنا اللہ نال جاملیا۔ اماں تے ادا نا انھاں کو بھی بڑا صدمو تھو۔ گھر روشن دین کا ترے بھائی رہ گیا۔ نکاد ہواں بھائیاں کوناں۔۔ ایک کوناں ، حسن دین تے ساراں توں نکا کوناں عالم دین تھو۔ روشن دین کا ماں باپ نی بڑا اکھا دھیاڑا دیکھیا تھا۔ روشن دین پنج سالوں کو تھو جے باپ نی اس نامولوی کریم کا مدرسہ داخل کرا چھوڑیو۔ اک آس تھی جے میر و بچو بھی دینی علم سکھ کے آوے کو تے ہم ناماز روزو سکھاوے کو۔۔ روشن دین کا دل مایو ہی خیال ہر ویلے ستاوے تھو۔ جے ادو جنگل مالکڑی کپتو ہووے کو، تے اماں مال چوکھرو واسطے اتھوائی بناتی ہووے گی۔ تے نکا بھائی گھر مابلی کا بچہ آروں ٹٹیتا ہوویں کا۔ روشن دین نے رو، تا، کے مدرسہ ماک سال پور وکیو۔ تے مدرسہ بچوں نس آئیو۔ مچ سارا لوکاں نے روشن دین نا کہیو جے توں پڑھتو رہو اک دھیاڑے توں بڑو عالم دین بن جائے کو۔۔ کسے سہیانا کو اکھان ہے جے رستو تے ہر کوئے دوسے، خرچ کو لے کوئے نہیں دیتو۔۔ روشن دین نایاہ گل بھیڑی لگے تھی جے ادو کی لو گھروں نکلے تے چر شام شام کفتاں کی آذان ویلے بوہاتوں اندر بڑے تھو۔ کدے کدے اس توں بھی چر ہو جائے تھو۔ روشن دین کا دل ماک ہی خیال آوے تھو، جے ادا نا جائے بھی ایک دکی ہو جائے تے مھاراسر پر کون ہتھ رکھے گو۔

یہ گل اس دھیاڑا کی ہے۔ جس دھیاڑے کی ساراں نا مچ خوشی ہووے۔ جس نابڑو دھیاڑو بھی کہیو جائے۔ کئی عید کے دھیاڑے روشن دین جیو۔ اک ہی دھیاڑا پر لوکاں نادو دو خوشی نصیب ہوئی۔ جتنی خوشی لوکاں نا عید کا چن کی تھی۔ اتنی خوشی روشن دین کا جمن پر ہوئی جے اللہ نے میاں عبد الرحمن نا چن جکیو جاتک دتو۔ جہڑو بھی کوئے گھر آوے تھو وہ روشن دین کو منہ دیکھیاں بغیر نہیں تھو جائے۔ روشن دین کی اماں بھی ماند کی کی حالت ماتھی۔ گھر کو کام کاج میاں عبد الرحمن کے سر تھو۔۔ چر شام جے نال ایک مولوی ہو ر گھر کا بوہا پر آیا۔ مولوی ہوراں نے سلام کیو تے ادا نے وعلیکم السلام۔۔ مولوی ہوراں نے ادا نا کہیو بھایا عبد الرحمن تنان مچ مچ مبارک ہووے۔ تھارا گھر مال اللہ نے سہسو جیو نکو جاتک دتو۔۔ مبارک چلی تے ادا نے مولوی ہوراں نا تھلہ پر آئیو، بیٹھا کے دودھ کو پیا لو دتو۔ مولوی ہوراں نے کیو جے نکا نا منان بھی دسیو۔ ادا نے روشن دین نا کھندولی پروں چاکے مولوی ہوراں کا ہتھ پھر رکھیو تے نکا نا دیکھتاں ہی مولوی ہوراں نے کہیو۔ اس کوناں ہوں رکھوں کو۔ تے نکا کوناں روشن دین رکھیو۔

غربی کا دھیاڑا تھا۔ ادو بچارو کی لونال گھروں نکل جائے تھو۔ تے چر شام نال گھر مڑے تھو۔ روشن دین توں ایک بڑی بہن تے ایک بڑو بھائی تھو۔ افسوس کی گل ہے۔ بڑو بھائی نذر دیں تے بڑی

غریبی کا دیھاڑا تھا۔ مناں یاد ہے۔ بے ادو دیھاڑی لان واسطے جائے تھو۔ تے اماں لوکاں کا برتن مانج کے آٹو دانو گھر لیاوے تھی تے ہم ناپکا کے دیئے تھی۔ جس ویلے روشن دین باپ سنگ کام پر جان لگ پئیو۔ تے اپنی ماں ناکہن لگو، اماں ہن مدے کسے کے گھر جا کے برتن مانجھتی ہووے۔ ہن ہوں جو ان ہاں تے تم نے گھروں باہر کسے کا بیڑا پر نہیں جانو، ہوں آپے آٹو دانو لیر کپڑا لیاؤں کو۔

حسن دین پنجویں تے عالم دین آٹھویں پڑے تھو۔ پہلی بار جد روشن دین ناکام پروں پیسہ لبھاتے وہ دو ہواں بھائیاں واسطے اسکول کی وردی تے اماں واسطے گوگیاں آلو سوٹ لیاؤ۔ جس ویلے روشن دین گھر لیر لے کے آئیو تے اماں کی جیب پر یہی الفاظ تھا۔ "جا بچہ اللہ تیری کنڈنا لاوے، تے اللہ تیری عمر بڑی کرے،،

مساں مساں روشن کو ہتھ چلن لگو تھو بے اچن چیت ادا نا کجھ ماند کی لگ گئی۔۔ تے صحت خراب ہو گئی۔ ہن کے کرے چار پنچ دیھاڑا گزر گیا کو لے کوئے خرچ نہ تھو۔ نہ کوئے چھلڑ تھو لگو۔ ادا کی دوا درمل واسطے کوئے پیسو کو لے نہیں تھو۔ ادا کا۔ پورا جسم نادر تھو۔ تے جیب پر ایک ہی لفظ تھو۔ ہن ہوں مر چلیو۔ ہوں نہیں بچتو، سارو ٹیر پریشان تھو، کجھ دیھاڑا توں ادا نے منہ کے نیڑے پانی کی کوٹ بھی نہیں کی تھی۔

اک دیھاڑے ادو مچ لاچار تھو۔ پٹشی ویلے ادا کو مسیر بھائی جس نا حاکمیو کہیں تھا۔ وہ آئیو تے اس نے دسیو کہ بھایا عبد الرحمن

شہر ماک مچ بڑو حکیم ہے۔۔ جس کو ناں یشپال سنگھ ہے۔ اس کو لے لے جاؤ۔ بھایا حاکمیو نے تھوڑا پیشہ وی دیتا۔ ادا ناڈ گئی پر چاکے لے جاں تھارستہ ماک جگہ ادا نے اونچی ساہ لیو۔ تے کلمہ پڑھن کی آواز آئی۔ جچر توڑی ڈنگی بن ترنا۔ اس ویلے توڑی ادا کی نبض بند ہو گئی تھی۔ روشن دین نا جس گل کوڈر تھو واہی ہوئی۔۔ ادو ہم ساراں ناچھوڑ کے اپنا اللہ کو لے چلیو گئیو۔ اِنَّا لِلّٰہِ وَاِنَّا اِلَیْہِ رَاجِعُوْنَ۔ ہن مھاراسر پر ہتھ کون رکھے کو۔ دنیا کا بختاں تے قضیاں توں ادا کی جان چھٹ گئی۔ پر مھارو سہارو ٹر گئیو۔

جد ادا کا جنازہ نالے کے گھر آیا۔ گھر ما بھائیاں تے اماں نا خبر ہوئی۔ انکی اکھاں توں آتھرواں کی ناڑی لگ گئی۔۔ پر پھر بھی صبر کیو۔ جس طرح اللہ نا منظور ہووے۔۔ پہلو پھٹ مساں ہی مولیو تھو۔ روشن دین نے بھی تھوڑو سکھ کو ساہ لیو تھو۔۔ چار پنچ مہینہ گزریا ہی تھا۔ بے اماں نادل کا دور اپن لگ پئیو۔ کوئے بس نا چلیو۔۔ اک دیھاڑے روشن دین بھی کام پر چلیو گئیو۔ تے نکا بھائی بھی اسکول ٹر گیا۔ جد اسکولوں بھائیاں ناچھٹی ہوئی۔۔ دو پیسے رستے گل کرتا آویں بے اماں نی مھارے واسطے مک کی روٹی نیلو ساگ تے بورمی لسی بنا کے رکھی ہووے گی۔۔۔ اج وردی بدلان توں پہلاں ہم روٹی کھاں گا۔ گھر بوہا بچو اندر بڑھتا دیکھیں بے اماں تھلہ پر لمبی نیند سستی بھی۔ نہ ہی گل ما چھیری۔ بھائیاں کا سارا خواب آتے کاتے رہ گیا۔

## "بابو سائیں"

افسانہ نگار: طارق شبنم گوجری ترجمو: محمد وقار صدیقی ریسرچ اسکالر، (جموں و کشمیر)



”بابا۔۔ ہوں وہ اس دو جا محلہ مانہ رہن آلا کبیر پٹھان کو گیدروہاں  
تھارے نال ملاقات کرن واسطے آہاں۔“

”بچیا اللہ تنناں مچ خوش رکھے توں سلامت رے۔۔ توں آباد رے“

ساراں کا بہڑاں تیں نا امید ہو کے شاکر کھر آہو ساری رات تلخی کی  
حالت مانہ کنڈاں ور گزاری چھوڑی، کیوں بے ویلو تیزی سنگ اگاں  
نسے تھوکائے وی اس کی مدد کرن واسطے تیار نہیں وے تھو، اپناتے  
پرائیا ساراں تیں منہ موڑیں تھ۔ شاکر اپنی پریشانی تے مصیبت مانہ  
لے کے سویرے سویرے ہی مچ امید اں سنگ بابا سائیں کے کھر بچہ گیو  
تے اگے کے ہیرے کہ بابو کھر کے اندروں پانی کی بالٹی لے کے نکل  
ریو تھو، شاکر کول بابو آ کے کھل گیو تے شاکر نے بڑی عزت سنگ  
سلام کیو، وعلیکم السلام کہہ کے اس نے شاکر ناخنہ بہڑا مانہ ڈائی وی  
پھڑی ور بہسن کو کیو تے آپے بالٹی چاکے کول ہی تھریا واک مٹی کا  
بڑا پانڈا مانہ پانی کہلیو۔ بالٹی لے کے فیر اندر گیو تے کچھ ویلے تیں بعد  
فیر پانی کی اک بالٹی لے کے آگیو تے اس بچوں ادھو پانی اسے پانڈا  
مانہ کھل چھوڑیو، جدوہ بھر گیو تے ادھو پانی دور رکھیا واک مٹی کا ہی اک نکا  
جا پانڈا مانہ کھل چھوڑیو۔ شاکر یو سار و منظر اپنی اکھاں سنگ ہیر ریو  
تھو۔ شاکر حیران رہ گیو کہ اس مچ گرمی مانہ پانی کی مچ لوڑ کے باوجود  
بابو انھاں پانڈاں مانہ پانی کیوں کہلے لگو وی؟

”بچیا توں۔۔۔۔ کہہ اگر اں تیں ہیں تے کس کم واسطے آہو ہیں؟“

شاکر اجاں سمجھن کی کوشش ہی کرے تھو کہ بابا کی میٹھی آواز اس کا  
کنناں سنگ ٹکری۔

”تیرا مچ کرم ہے میرا اللہ۔۔۔۔۔“

۔ شاکر نے ہیر یوتے سات آٹھ کتساہ پھوکی ہو یا و آیتے پانی پین لگا  
جد کہ دو جا پانڈا منھ رکھو واپانی سنگ مچ ساری چڑی پتنگھی اپنی اپنی  
تیس بجھا ہن لگی، شاکر ناخو وی اپنا سوال کو جواب مل گیو۔ اسے ویلے  
کھر کے اندروں اک بزرگ خاتون پردانہ منھ نکلی تے چڑیاں پتنگیاں  
اگے دانہ کھلن لگی۔

آشمان کنیں ہیرتاں والں وہ فیرشا کر کنیں مڑیو۔

”دسوں کو باباجی، اجاں کے تاول ہے؟“

اس تیس پہلاں شاکر بابا کو لوں بستہ کے بارامانہ پوچھتو اک منگن آلا  
نے آکے اچی آواز دیتی۔

شاکر نے جلدی جلدی گوجا پتوں دس روپیہ کو نوٹ کڈ کے منگن آلا  
کا ہتھ ور رکھ چھوڑیو۔

”بہس جالہ کیا بندیا“

بابا نے بڑا پیار نال کہہ کے اس ناخہ پھیاں بھسالیو تے اس کے سامنے  
چاہ کی پیالی رکھتاں واں کہیو۔

”ہن دہس کے مجبوری ہے تیری؟“

”بابا۔۔۔ ہوں منگن آلو نہیں ہاں بلکن اک مجبور تے لپار باپ ہوں  
، میری گیدری کجھاں تہیاڑاں تیں بیمار ہے اس کا علاج کے واسطے  
میرے کول کائے پیسو تہلی نہیں ہے۔“

اس کی یا گل سن کے بابا نے نظر آستان کنیں کرتاں واں بے چینی کی  
حالت مانھ سوچن لگو۔۔۔۔۔ کجھ دیر کے بعد ہی اک گیدر ہتھ مانھ  
کر بولیو وہ آیو، اسلام علیکم کہہ کے کجھ پیسہ بابا ناخہ دیتاں واں کہن لگو  
۔

”بابا سائیں۔۔۔۔۔ پورا مہینہ کا پیسہ ہیں۔“

”شکریو بچیا۔۔۔۔۔ خوش رکھے اللہ تئاں۔“

پیسہ لیتاں واں بابا کا منہ ور ہسی آئی تے بابا نے آستان کنیں منہ کر کے  
فیر اپی آواز مانھ آلو آل ہویا۔

”اللہ تیر ولاکھ لاکھ شکر ہے۔۔۔۔۔ بے شک تو بڑو کار ساز ہے

۔۔۔۔۔“

وہ گیدر واند رگیو تے دودھ لے کے واپس چلیو گیو۔

”توں اپنی گیدری کو چنگی طرح نال علاج کروا، کسے چیز کی لوڑ ہووے  
تے بغیر کسے ڈر خوف کے میرے کول آجایا کر۔“

بابا نے گیدر اکولوں لیا واسار اپیہ منگن آلا کے ہتھ تھمتاں واں مچ پیار  
سنگ کہیو۔

”شکریو باباجی۔۔۔۔۔ تھارو یو احسان ہوں ساری زندگی نہیں بھلا  
سکتو۔“

”او بچیا احسان کہڑو۔۔۔۔۔؟ احسان تے میرے ور میرا اللہ کو ہے  
جس نے مچ لوڑ ویلے مناں دیتو تے میناں تیری مدد کو موقوف دیتو۔“  
”چنگا باباجی ہن ہوں چلوں ہاں۔“

بابا کا حالات تیں واقف ہو کے شاکر کا منہ ور غمناکی چھان لگ پئی  
تھوڑا چیر بعد وہ وی اپنا آن کو اصلی مقصد دہسن تیں بغیر ہی جان لگو۔  
”بچیا۔۔۔۔۔ تیں تے کجھ دسیو ہی نہیں کے توں کیوں آیو تھو؟“

”بابا۔۔۔۔۔ ہوں بس نیوں ہی آیو تھو۔۔۔۔۔“

”نیوں ہی نہیں بچیا، بغیر خوف تے ڈر کے دہس مناں کہڑی گلوں آیو  
تھو۔“

اس نے شاکر کی گل کنتاں واں کہیو۔

”بابا۔۔۔۔۔ وہ کے ہے کہ۔۔۔۔۔“

شاکر کی زبان کمں لگی۔


”بچیا شرمانو نہیں۔۔۔۔۔ بول کے گل ہے کے پریشانی ہے۔“

”باباجی۔۔۔۔۔ اصل مانھ میری بہن کو بیاہ ہے تے مناں کجھ پیساں  
کی لوڑ ہے۔“



بیچمن کی بولی کو پیسہ ہر دوترے منشاں مانھ بڑھتو ہی جارہیو تھوتے شا  
کر سنناں ہی اپناں کنناں مانھ انگلی کھل کے جلدی جلدی قدم چاتاں  
واں اتوں نکل گیو۔ اس ناھ اسو لگو کہ جسرے موت کو اک چھنگو اس  
ناھ ٹوکے نکل گیوے۔۔۔

## غزل مخلص وجدانی



یارنے کی تصدیق تے ہے

شعر مری تخلیق تے ہے

صاف نہجھتو ہوں بھی نہیں

میر و ایک شریک تے ہے

رات دیہاڑی میں اکساں

تھوڑی مچ تفریق تے ہے

میر ایار کو حال سنا

تکڑو بل ہے، ٹھیک تے ہے

اُس کو شہر ہے کیسو دہس

توں اُت کو بسنیک تے ہے

کہہ میں سکتو تاراں کی

میر اہتھ مالیک تے ہے

دیکھو فیصلو آوے کو

میری اج تریک تے ہے

مخلص یار نے آنو تھو

اُس کی اج اڈیک تے ہے

## "حرمت قرآن کریم تے امت مسلمہ کی ذمہ داریں"

:شاہدہ چوہدری بنت قاضی محمد بشیر (راولپنڈی)

اخبار اور ٹی وی چینلاں ور نظر کھلی جائے تے کتناں نے ادارہ تے کالم لکھیا اور کتنا چینل ایس جنہاں نے کائے موثر مکالمات کو انتظام کیو ہے؟ بے بسی تے مایوسی تیں بغیر کچھ وی نہیں دستو۔ جو کچھ لکھیا کیو ہے وہ وی محض مذمت تے جذبات کو نعروں ہی تھو۔ ایسا معاملہ ناخہ روکن واسطے کائے وی عملی تجویز پڑھن یا سنن ناخہ نہیں آئی۔

میر و خیال اے کہ امت مسلمہ اپنی بے بسی تے بے بسی کی آخری حد ناخہ کچھ گئی ہے۔ آپسی اختلافاں نے دوا رب مسلماناں ناخہ بے دردی کی چلی سطح ور کھلا چھوڑیو ہے سوچو جائے تے اس توں نکلن کی کائے سبیل نی دہستی۔

ات میناں میاں بشیر احمد لاروی رحمۃ اللہ علیہ (وانگٹ شریف) ہوراں کی یاہ گل یاد آئی ہے کہ مسلماناں ناخہ آپس اتفاق نہیں رہیو۔ اس واسطے مجموعی طور ور امت کا بارہ ناخہ کچھ کہنوی ممکن نہیں۔ اس بارہ ناخہ کچھ کچھ تجویز عمل ناخہ لائی جا جاسکیں۔

دیکھنویو ہے کہ کھڑا کھڑا مسلم ملک ایس جنہاں نے سرکاری طور ور اس واقعہ کی مذمت کی اور کھڑا ملک ایس جہڑا خاموش رہیا اور اس کی کے وجہ ہو سکے۔

اس سارا واقعہ توں ہم مسلماناں نے کہ سبق لیو ہے؟ ہم کدے اس واقعہ ناخہ وی کچھ دنناں ناخہ بھل تے نہیں جاساں یا یوہ ایک رستاز ختم کی طرح تازو رہ گو، ایسولائجہ عمل تیار کرن کی لوڑ ہے

سوئیڈن سرکار کی سرپرستی ناخہ قرآن کریم ناں اگ لائی گئی۔ یو ایک غیر معمولی واقعہ تھو۔ اس توں امت مسلمہ نے کہ سکھیو؟ اور اس کی روک تھام واسطے ہون تک کھڑو قدم چاویا کھڑی تجویز دتیں گئی ہیں؟ اجاں توڑی کی اطلاع کے مطابق پاکستان کی تحریک ور اقوام متحدہ نے ایک مذمتی قرار داد پاس کی ہے اور اس طرح کا واقعات ناخہ روکن ور زور کھلیو ہے۔

دوجی خبر کے مطابق کویت حکومت نے سوئیڈن زبان ناخہ ایک لکھ ترجمہ قرآن کریم سوئیڈن ناخہ تقسیم کرن کو منصوبہ شروع کیو ہے۔ اطلاع کے مطابق سوئیڈن ناخہ رہن آلا بچاں نے قرآن کریم ناں اگ لان آلی جگہ ور اکھاں ہو کے تلاوت قرآن کریم کر کے بکھرا انداز ناخہ قرآن کریم ناں اپنی عقیدت کو اظہار کیو ہے، جس ناخہ بہوں ساری کامیابی لہی ہے۔

افغانستان نے اپنا ملک ناخہ سوئیڈن کا سفارتخانہ کی سرگرمی ناخہ چھٹی کر کے معاف کرن توڑی پابندی لان کو فیصلو کیو ہے۔

اجاں توڑی بہوں ساراں اسلامی ملاں ناخہ احتجاج ہو یو پر پاکستانی قوم کی یاہ بد قسمتی کہ ہر لابی نے بکھ کچھ احتجاجی پروگرام کر کے اپنا اپن نمبر بنان کی اڈی چوٹی کو زور لایو ہے پر پورا ملک ناخہ کائے وی قابل ذکر احتجاج دیکھن ناخہ نہیں آئیو۔ جہڑا لوک توہین قرآن کریم جیسا واقعہ ور متحد نہیں ہو سکیا انھاں تیں بدتر کون وے کو؟

کہ آن آلاکل مانھ ایسا واقعات ناھ روک سکاں اور اللہ ناھ کرے یوہ  
عمل فزوے تے مہارورد عمل کے وے کو؟

ہم ناں یاہ گل نظر انداز نہیں کرنی چاہیے کہ ایک ملعون کا اس بدترین  
عمل نال ارباں انساناں مانھ قرآن کریم کا بارہ مانھ جن استفسار نے  
جنم لیواے کہ ہم ان کی اس بیاس ناں بجھان کو اہتمام کر سکاں؟ اس  
شر توں خیر کس طرح برآمد ہو سکے؟

مغربی معاشرہ واسطے قرآن نال آگاہی کی ایسی مہم شروع کرن کی لوڑ  
ہے کہ وے قرآن کریم کا بارہ مانھ استفسار کو جواب حاصل کر سکیں۔

مہارو ایمان اے کہ اسی ہزار واردات وی قرآن کریم ناں مٹا نہیں  
سکتیں بلکہ اس ور ہر حملو اس کی تعلیم و تدریس ناھ اور نکھار دے کو۔  
اللہ تعالیٰ کو فرمان ہے کہ: "بے شک ہم نے ہی یوہ ذکر نازل کیواے  
اور ہم ہی اس کی حفاظت کا ذمہ دار آں۔"

ہم ناھ دنیا تک قرآن کی تعلیمات پہوچان واسطے کوشش کرن کی لوڑ  
ہے۔

اگر ممکن وے تے عالمی سطح کی اسلامی تحریک مل کہ اساد عوتی مراکز  
تیار کریں جہڑا ہر طرح استعمال کر کے دنیا کی تمام زبانوں وچ قرآن  
ناھ اس کا بیان کا مطابق پیش کیو جائے۔

میر ویو ہی پیغام ہے کہ اس سانحہ کا نتیجہ مانھ اگر دو ارب مسلمان  
قرآن کریم نال جڑ جائیں تے مہاری ساریں کمزوری خوبیاں مانھ بدل  
جائیں کی ان شاء اللہ

شاعر مشرق نے کتنی سوہنی گل کہی ہے:

گر تو می خواہی مسلمان زیستن

نیست ممکن جز یہ قرآن زیستن

غزل

حنیف محمد چوہدری



ہن یہ قصہ چھوڑ دے تو یاہ کہانی رہن دے  
میں گزاری کس طرح یاہ زندگانی رہن دے

کیوں کچھ تو میریاں اکھاں غی لو کنگا گئی  
میں مکایو کس طرح اکھاں غوپانی رہن دے  
تیں محبت ای اگر کرنی نہی جے دوستا  
اس تیں اگیہ ہو رکے ہن گل بدہانی رہن دے  
تانو پیٹو بن غے جس ناں ہم دوئی بے بتاریا  
چھیکڑ آنے کس جگہ ٹٹی یاہ تانی رہن دے

آپ اپنا اس غے پیچھے کتنا اک میں رو لیو  
کتناں اک رستاں غی فر میں خاک چھانی رہن دے

روگ میری جان ناں یو کس نے لایو دوستا  
میرے اوپر غم غی چھتری کس نے تانی رہن دے  
میں تسایاں ہونے وی احسان فی چا یو تیرو  
اپنا چشمہ رہن دے تو اپنوپانی رہن دے

یا خدا اس دنیا مانہہ جد تک یو میرو جتو ہے  
میرا ساہ غاروپ مانہہ اس غی نشانی رہن دے

# غزل۔ چوہدری خلیل انجم کوٹلی



روٹھاناں مناتو رہیئے

روتاناں حسنا تو رہیئے

نفرت کا طوفاناں وچ

گیت پیار کا گاتو رہیئے

جنگ جدل کی بستی ماں

امن کی تیج سجا تو رہیئے

پانہجی اپنی ساری تک غے

سادو توں بچھا تو رہیئے

طعنہ شعنہ سن سنا غے

اپنی سانجھ نبھا تو رہیئے

سچو دین اسلام ہے بیشک

دنیا ناں سمجھا تو رہیئے

حق ناں نیے حق ور چلئے

حق کو نعر ولا تو رہیئے

پچھلا پہر آٹھ کھلو غے

ساجن ناں مناتو رہیئے

گو جری ریت پریت جو ساری

لکھتو، سننٹو، سنا تو رہیئے

آپنا خلیل ناں خلیل بنا غے

دم دم ساہ پکا تو رہیئے



## ----- غزل ----- محمد فرید راز (جموں کشمیر)



اس کی یاد بھلاؤں کس را

دل کو حال سناؤں کس را

یاد اں کا یہ انگار ا پکھتا۔

دسو کوئی بجھاؤں کس را

دردی کوئے نہیں میر و جگ ماہنہ

دل ناہوں سمجھاؤں کس را

دل کی رکڑ تہرتی اندر۔

پیارگی تھل کماؤں کس را

سجن میر اسب بے تھہویا۔

دل گی دولت لٹاؤں کس را

دل تے راز مثال اے کچ گی۔

بٹاں سنگ ٹکراؤں کس را

# تیں میری کشمیرنی دیکھی

حق نواز احمد (عباس پور)



ترے ٹوٹاں ماترے فہکے

تیں میری کشمیرنی دیکھی

رانجھاں گی تیں ہیرنی دیکھی

دُکھیا تے دل گیرنی دیکھی

اک زمانو بیت گیو ہے

چلتی کوئی تے تدبیرنی دیکھی

تیں کہ دیکھے؟ لکھ نی دیکھے

بے جنت نظیرنی دیکھی

اے امن گاٹھیکے دارو

ظلموں کی آخرنی دیکھی؟

لاشوں کی بارات تے دیکھیں

خواباں کی تعبیرنی دیکھی

سارو جگ نواز ہے دیکھے

غم کی جی تصویرنی دیکھی

زل گے ٹوٹا ٹوٹا کیا

سینہ پر لکیرنی دیکھی؟

## نظم۔ قدرت کا نظارہ۔۔۔ مشتاق احمد فانی (جموں کشمیر)



کُچھ سمندر ماہنہ رہیں زندہ کجھا کی جان کڈ دے  
کُچھ پل پل کے مجھ بنیا کجھا کا کڈ کے بڈ دے


کجھ مالک آبی خشکی کا کجھ ہوویں مہاجر بھی  
کُچھ کولے ٹہا کووے کجھ ناہنہ دے کے بڈ دے

جت حاکم بھی بناوے وہ گداگر بھی بنا چھوڑے  
ہو اماہنہ وہ اڈا کے فرز میں ور وہ مڈ دے

کجھ ناہنہ دے کے ٹہاری اک کروڑاں ماہنہ کھیڈا چھوڑیا  
کجھ ناہنہ دے کے دولت فرز میں کے بچ گڈ دے

فانی جنگل ماہنہ کجھ ڈریں کجھ دے بادشاہ بھی ہیں  
ڈرے تھو شیر دُبن تیں تے موجی بھی اُت ڈڈ دے

## غزل۔۔ زاہدہ خانم چوہدری



سلور کٹ کے ہارنی بنتا

لکھاں گا انگارنی بنتا

دودھ پلاے جتنو مرضی

سپ کدے دلدارنی بنتا

پھتراں ناں کے درد سناوے

بُت کدے غمخوارنی بنتا

بھاویں چمکے سوناہاروں

پتل گارے ہارنی بنتا

خانم پہلاں سکھنو پوے

اچانیوں وقارنی بنتا

تبصرے

## مفتی فداء الرحمن سیال، رکن مرکزی مجلس شوریٰ نوجوان علماء کو نسل بالا کوٹ

ماہنامہ بزم گوجری مئی جون، اس وخت میرے سامنے ہے۔ مٹا اسکو انتظار ہوئے جد نظر آجائے تے ہوں اپنو دوجی کتاباں کو مطالعو چھوڑ کے پہلاں اس غو مطالعو کروں، مٹا اس کی افادیت کو بڑومان تے یقین ہے خاص طور پر انہاں لوکاں واسطے جہڑا گوجری لکھن تے پڑھن کو شوق رکھیں۔ جت نوانو لفظ تے انہاں کا تلفظ ملیں اتے اس گل کو وی اندازو ہوئے کے کس راح ٹھوس گوجری لفظ پر دوجی زبان تے علاقائی لہجہ کو اثر پے گیو ہے۔

اج کشمیر مانھ گوجری لہجو ہو رہے تے بالا کوٹ مانھ ہو راگے آلائی بگلرام، سوات مانھ ہو رہو لہجو ہے جس تے یاہ گل محسوس ہوئے کے ہم نے اپنی مادری زبان نال مچ ظلم کیو ہے۔ کسے وی زبان کی ترقی مانھ اسکا درست تلفظ کو اہم کردار ہوئے۔ ہوں یاہ گل محسوس کروں کے بڑی حد تک بزم گوجری کو یو پرچو اس چیز نادور کرے کو تے گوجری کو اصل تلفظ تے لہجو فراپنو مقام چالیسو کو ہوں بزم گوجری کی پوری ٹیم نامبارخ وی دیوں کو تے یو مشوروی کے اس ناڈ بختل تے علاوہ وی شائع کریں تے اس واسطے اسکو مناسب حدیوی رکھیں۔

باقی دوہو مشورہ وی ہیں کے اس مانھ قرآن مجید کو ترجمو، تفسیر تے حدیث مبارکہ وی پہلا صفحاں مانھ ہوئے۔ تے دوجو یو کے لکھاریاں کو تعارف تے فون نمبر ضرور لکھیو جائے انہاں کو فونو نہ لایو جائے تے گوجری کی کاوت وی لکھی جائیں۔ (کائے گل مندی لگے تے پیشگی معذرت)

## شیر احمد کٹھانہ اوگی مانسہرہ

باسمہ تعالیٰ کج اک دیں پہلاں مٹاں رسالہ ماہنامہ بزم گوجری مئی جون 2023 ملیو بے اس مامیر و مضمون باعث بدر بھی چھپیو ہو یو تھو یو مضمون میں روزہ کا چین ماکھیو تھو رسالہ مٹاں موبائی ل پو پی۔ ڈی۔ ایف۔ کی شکل مالمیو تھو اس کو مطالعہ میرا واسطے تھوڑا دکھو (مشکل) اس وجہ پو تھو کیم جے ہوں بیمار اے آن تے ڈاکٹر نے موبائی ل کا استعمال تے ڈیکو اے خاص کر کے لکھن پڑھن تے اس تے ویڈیوز وغیرہ کا دیکھن تے لیکن اپڑی میٹھی پیاری ماں جاگی (مادری) جیجھ کو ایک سون اٹائی ٹل کو پیار و جو رسالہ تے مسیھی اس ماپڑو مضمون بھی چھپیو ہو یو ملیو تو پر ہیز توڑنی پئی جہب جہب تے رسالہ کا پتر پر تہیہ ہاں تے پہلاں فہرست پو غور کیو نو اپڑو مضمون شروع شروع مادر ج لہو اس گل پو دل مچ خوش ہو یو بے چل اللہ کو کرم ہو یو بے جڑو کاغذ کالو کیو تھو اس نا بڑا اچھا مقام پو جا مل گئی اے اس پو اللہ کو شکر ادا کیو آں تے بلا تفریق رسالہ کا سارا ذمہ داراں کو بھی مشکور اے جے انہاں نے میرا شان اس رنگ کا نالائی قادی بھی اس لائی ق سمجھیو جے اس کا کھینڈیا ویران الفاظ ایک سامڑے مقام پو درج کیا اس رسالہ ما مچ سارا دوستان تے بزرگاں کا اقوال مختلف انداز مادر ج تھا لوک کہانی، شاعری، تبصرے، تحقیقی مضامین، وغیرہ وغیرہ ان مامناں لوک کہانی ”سیانو

بادشاہ "ترجمو نگار، اسلام الحق صاحب مرادن الہ کی ابتدائی تحقیق، لوک کہانی کی لفظی، اصطلاحی تعریف وغیرہ تے علمی فائی دوہو یو اللہ جزائے خیر دے۔ شاعر جاوید سحر کی غزل فریاداں گا دلگ پھلورے۔ کاہن دل کی اک پھلورے بڑی اچھی لگی۔ مسیحی محمد ٹھا کر صاحب کی غزل مچ کوڑا اقرار نہیں کر سوں دو ٹھاراں کو پیار نہیں کر سوں مچ اچھی لگی حالات حاضرہ کی اچھی عکاسی کئی اے خلیل الرحمن قمر صاحب کا روزہ کا متعلق فرمان کو ترجمو ممتاز احمد چودھری صاحب نے کیونچ اچھو لگو بلکہ بڑو سبق ملاو ہو یو صفر ربانی صاحب نے عبدالرشید صاحب کی نعتیہ کتاب ہورتے پلے کج وی نیں و جڑو تبصر و کیو بڑو مایا ناز انداز ماتھو اچھو لگو۔ مشتاق خالد صاحب کی تلفظ و املا کی اہمیت پو تحقیقی بحث تے مچ فائی دوہو یو خوش آئی۔ دل ماہور بھی مچ کچھ ہے لیکن موبائی ل داسلسل دیکھنی سکتو سر پو چکر آئے اسی پو اکتفا کروں اے اس دعا کا نال بے اللہ رسالہ نادوام تے ترقی دیو اس کا لکھاریاں آں تے اس کا تیار کرنے آلہ نامزید توفیق دیوں۔

## ساجد بانیاں، اسلام آباد

"بزم گو جری" ہر مہینے مل جے، پر کوئی تاریخ طے نہیں۔ کتنو جنگو ہوئے جے تم ہر مہینہ کی پنج تاریخ ناں شائع کر دیئے کریں۔ رسالو بہت معیاری ہے۔ گو جری لکھن آلا، بڑا، بڑا لوکاں نال نیا لکھاریاں نامو قعودین کی روایت مچ حوصلہ افزاء ہے۔ اس طرح ناں نوجوان لکھاریاں کی بڑی تعداد تیار وئے گی۔ نثر نگاری اور ترجمہ کاری و زیادہ توجہ دین کی ضرورت ہے۔ مجلس ادارت کی دیہاڑرات محنت ناں سلام نہ کرنو، زیادتی وئے گی۔ چوہان صاحب تے تھکتا نہیں پراناں کی ٹیم نا سلام پیش کروں۔

## فاخرہ انجم، راولپنڈی

بزم گو جری، جس کی اڈیک رہ، ایک سہنو، معیاری تے دل پسند رسالو ہے۔ ہوں خود وی لکھن کی کوشش کروں گی۔ ترجمو شروع کیو ہے۔ کسے لکھاری ناں چیک کرالیو تے چھپ کارن بھیجوں گی۔ گو جری کا بھلیا بساریا درجنال لفظ پڑھ کے نکال ہوتا غی بیٹھک یاد آگئیں۔ اپنی زبان نال جڑن کا کتنا فائدہ ہیں، اس کو پہلاں اندازو نہیں تھو۔ نئی نسل ناں مادری زبان نال جوڑن کی لوڑ ہے۔ ہم روز اس رسالہ کا دو تریں ورقہ پڑھ کے سو آں۔ مہارے گھر ماں جیہڑو مجھان آوئے، اماں ہو ر اس ناں رسالو ضرور پڑھاویں۔ بس اشاعت کی کوئے ایک تاریخ مقرر کر دیو، مہربانی وئے گی۔

## نور محمد کسانہ، مظفر آباد

بزم گو جری پچھلا مہینہ کسے دوست نے واٹس ایپ کیو، بہت خوشی ہوئی۔ گو جری زبان مہاری کئی عام بولی جائے پر لکھن کو رواج کھٹ تھو، یو رسالو دیکھنے منان وی لکھن غوشوق پئے گیو ہے۔ اگلا مہینہ توں، میر و نام وی شامل کرو۔ اس محنت ورساری ٹیم ناں میر و سلام عقیدت۔